

四庫全書

集部

欽定四庫全書

純白齋類稿卷六

元 胡助 撰

七言古體

九月四夜夢與客賦詩覺而記其首一句甚異
之因續成牛馬行

天子養馬農養牛馬牛異養功同優金鞍玉勒日千里
雨笠烟蓑春一疇四夷入貢飽立仗寸土不荒田有收
主恩能酬稱爾德人愧無良食爾力曾聞朽骨埋敝帷

亦見道傍徵喘息吾嘗載筆扈宸游
谷量馬牛青海頭
夜雨思歸別趙敬叔韋拱之

我昔郭西初到夕橫雨狂風滿船濕
高岬泥淖不可登
蓬底僵眠愁悵鬱明日新晴見故人
握手一笑百憂失
艸池春夢久荒涼康樂遺風猶彷彿
華蓋山頭屢遐覽
容城壇頂時獨立西麓南塘盡醉遊
良辰好友為余集
人間美味柑橘黃江上秋光畫圖出
向來不作三年淹
兩月留連非所及自歎瘦削殊清健
胸中頗亦負奇崛

擬和楊公百詠詩收拾萬象揮吟筆龍湫雁蕩遠莫到
路幽怕見鬼神泣中宵風雨從何來歸心無寐聽蕭瑟
山水增波回棹喜翰墨紀功能事畢他年夜雨宿雙溪
却話鹿城相會日

雲松巢歌

雲飄飄松落落巢居其巔古之樂右手招李白左手揖
劉伶二子平生但恨飲不足今我亦復昏昏醉不醒乃
呼雲而語之曰爾慎勿為淫雨害我秣與黍又撫松而

語之曰爾慎勿為棟梁徒遭斤斧傷豪門廣厦千萬間
何曾庇士開歡顏不如釀酒雲松表酣歌白首棲空山

遊道場何山追和東坡韻

碧瀾萬頃雲林麓伏虎道場在空谷兩山窈窕一山門
勢若奔馬來駐足野田春水白瀾漫古松時見蒼虬蟠
吟諷坡詩訪塵迹客行永日聆風湍昔人隱居不輕出
雲水漁樵屢爭席祇今危構須大材斧斤伐盡千年植
峰巒青擁小姬鬟霧雨冥濛杳靄間樓閣新成却灰後

鐘魚撞擊聞他山晦明變化忘昏旦白雲橫截青山半
安定古墓屬鄰僧我來再拜徒興歎

溪月歌

開元真人冰雪輝明月照徹餘不溪溪光月色兩奇絕
白玉盤墮青玻璃夜夜流光發清炯孤雲飛去千峰靜
真人嘯詠玉塵頭結廬正對金黿頂蒼虬翠鳳翔其中
上有縹緲之仙宮瓊林琪樹散清影此心此境將無同
溪山勝槩獨盡得黍珠長懸太虛碧

贈韓明善先生

宋之咎夔韓魏公子孫百世文獻風建炎南渡雲從龍
清門一派浙水東先生古貌古心胸千巖萬壑神秀鍾
平生學術無不通盛名遠震驚羣聾東南縉紳知所從
會稽禹穴聲淪淪潮陽家法醇而雄詞源浩汗江漢宗
追還正始何其工鏡湖清波濯芙蓉大篇磊落垂長虹
短章簡嚴秀孤松薦道功德螭蟠穹天球和鳴間笙鏞
胡不進之明光宮隱居高卧蓬萊峰少微耿耿光燭空

我來林下拜德容大雅豈弟祛愚蒙先生豈是商山翁
先生豈與沮溺同向來閔雨致年豐存誠濟物不言功
清泉白石佳趣濃寧甘曳尾泥塗中著書脫稿非終窮
世網安得羅冥鴻

壽吳宗師七十

番君之胄遊方外錦江壽櫟環仙佩帝遣承慶非常道
玄教大宗師二代赤松仙子手扶持玉皇香案前相對
一品清虛衆妙門萬靈炳耀天人際看雲天下閒閒老

笑閱人間希有歲蓬萊真境一陽生四海羽流成大會
紫炁丹光守龍虎御書新像照天地君不見崆峒廣成
別有長生方永贊萬年天子垂衣裳

孔明草廬圖

黃星脫耀炎風息中原板蕩歸奸賊三顧幡然起卧龍
指揮艸艸收荆益王業偏安天一隅出師震動民忘劬
人物自是伊呂徒甘服巾幘遮長驅偉哉廣漢春秋筆
千載之下懸漢日草廬入畫想英風何人不愛諸葛公

遼西孝友行

征東有士遷遼西孝友之行如白圭北堂萱草春霏霏
堂下荆花晝暉暉伯兮撫季心獨苦教以詩書勿工賈
季也成人感伯氏至今言之涕如雨空中鴻雁原上鴿
嗟我安得無此情尺布之謠古或病相煎正爾同根生
藝文先生新作傳民俗可淳風丕變有弟有弟掾中書
天報孝友興門閭

高彥敬亂石奔流

白雲微茫橫劒閣興到時時自盤礴高侯寫出胸中奇
亂石奔流美林壑西風老樹三峽秋雪花濺沫巖之幽
雷轉空山駭猿狖毫端直與元化侔倦客思歸結茅舍
丹青一幅千金價誰知正乏買山錢安得長年看此畫

瞻綠堂

我瞻淇澳青琅竿君子之節耐久看森森綠玉鎖秋骨
肅肅青飈生夏寒濟陽美人心不競作堂種竹風騷盛
鸞鳳飛翔松雪書誰其銘者龔子敬

還家示親友

去家一千五百日兩膺朝命躋清秩我生孤苦抱一誠
遠行不計多逢吉舍舟遵陸鄉山近紅葉黃花秋露濕
歸來相見親舊喜夜窓燈火談京邑玉堂南士幾人登
蕪陋方慙職纂述拜罷松楸又趨出上恩未報安敢逸
趙敬叔所藏漢天馬蒲萄鏡

武王求仙仍黷武不顧赤子顛岕苦金莖露滴秋風起
天馬西來渥洼水魑魅百怪無逃容神工獻技鍊青銅

鑄成明月飛當空千年精魄淪土中識者望氣如埋劍
取之持入閩王殿南國衣冠光閃電茂陵尤物人間見
蛟龍盤拏吐雲雨照君肝膽萬萬古

秦元之所藏墨梅

我家江南萬山底屋角梅花雪相似暗香疎影黃昏月
小園風致極清美竭來追逐玉堂仙梅花不見今三年
羅浮翠羽空入夢窮冬雪片飛娟娟秦君好詩仍好畫
展卷坐我孤山下素衣縱使京塵化標格天然自瀟灑

華光妙與梅寫真
蘭齋句法尤驚人
我今解官歸舊隱
長歌玉樹無邊春

郭熙雪林曉霽

雪壓梅花無處覓
曉起乾坤同一色
漁父蓑寒理釣綸
老樵擔重折山屐
怪來爽氣軒眉宇
有懷往事填胸臆
千年勁節還漢使
半夜奇功縛吳賊
剡溪棹回清興盡
秦嶺雲橫愁思極
梁園授簡賦先成
灞橋策驢詩獨得
振衣侍立契窅冥
閉門高卧甘岑寂
想當盤礴心良苦

中藏此意無人識郭熙能事乞真宰萬里之勢歸咫尺
要知詩畫本一源筆端須有千鈞力

葛稚川移居圖

仙翁夫婦清如冰牛背穩坐兒女并兩童牽挽陟岡陵
兀然不廢看丹經小鬟提攜擁前後藥囊劍佩收神靈
狸奴雞犬盡同載家具纖悉煩經營人生飄飄無定止
稚川亦復勞其形借問移居向何處白雲流水萬山青

瑞柳歌

兄弟初散柳凋零兄弟復合柳亦榮柳條弄色兄弟喜
青青上有枝連理和氣致祥臻厥美田家荆樹依稀似
陰陰濯秀春風饒有耳勿聽淮南謠詩人賦詠感物情
吳氏孝友聞上京我願家家躬孝友無惜行人攀瑞柳

題張煉師枯木竹石圖

洞府仙居森竹木山陰之陽剡溪曲千年老樹不知春
霹靂夜半龍起腹冷風吹雨入叢篠道人正抱黃庭讀
黃庭讀罷風雨定石根流水清如玉平明騎鶴上青天

但見白雲滿空谷

哀太師

自從天厯干戈起四海一家如鼎沸
權奸簸弄貪天功
攀龍附鳳皆倒置海內蒼生望太平
鼎湖仙馭俄上昇
老虎未死人莫測孰扶日轂遲遲行
大夫當時秉大義
手挈神器正天位爰立作相隆委寄
太師秦王勢益熾
朝廷大權既已歸斥賢用邪圖已私
變亂法度施橫政
責官鬻獄誰敢非王侯將相望塵拜
歌功頌德多豐碑

九重深拱方無為天下萬事由太師起居王食勝天上
生殺貴賤操主威千兵萬馬常自衛爪牙武士爭光輝
龍虎大符擅天寵振古權臣無若斯天變民災何足恤
神人怨怒宗社危綱常萬古不可絕君臣之分不可越
近郊出獵果何謀飛揚跋扈當車裂一朝天子奮乾剛
下詔薄責流遠方太陽杲杲冰山摧凶徒惡黨潛逃藏
家財簿錄不勝計石崇元載猶毫芒德音屢聞天下喜
治道復還舊典章嗚呼太師權勢如火滅鼎覆餗兮車

覆轍作詩哀之戒後來遺臭百世何為哉

苦寒行

至元四年冬仲月朝朝水冰夜飛雪山川縞素積堅凝
義御杳冥厚地裂僵卧馬牛縮如蝟土居塞向人處穴
江南文士官更寒竈突無烟薪炭絕髮梳脫落鬚撚折
口吻悲鳴心鬱結賴有元戎時慰勞新酒巨觥話吳越
安得凍解回春陽萬物熙熙生煖熱

月食遇雨詩

昔在唐元和中冬月遭食玉川子盧仝再拜作詩牋天
吐胸臆怪怪竒竒不成句屈曲聱牙口生棘昌黎韓公
豈效之意欲潤色刪厥辭玉川卒與甘露禍書生章甫
何必效此竒世人好怪厭平正風雅寥寥失其所凡遇
月食輒吟詠無不以盧仝為祖方今世平治改紀仍至
元黎庶安康今五年前是至元之曾孫是年己卯歲六
月十五夜月當食有常數星官太史食厚祿推測盡占
步布告中外滿京城百司庶府咸設香火具小兒救月

敲銅盆街市鬧喧喧仰頭但見滿天雲不見月魄虧幾
分東南西北有神物無路施功上青冥安能用刑法磔
死蝦蟇精夜深昏黑雨如注蕩滌炎暑生涼氣嘗聞日
月食陰翳不為災國家有道固如此妖異衰市人聞此
言開口笑咍咍或疑上天公諱疾忌醫深閼埋目盲出
涕泗化為霖雨來嗟乎天人之際誰能了一場怪事無
分曉我作詩殊近理不效盧仝效韓子

東坡載酒堂

儋州禿髻東坡翁平生自是人中龍才高見忌時不容
暮年再駕鯨波風南荒萬里懸孤忠堂堂氣節世所宗
中原消息誰其通夢魂猶遶蓬萊宮雷州別駕老更窮
瘴海相望雲重重枕榔林麓荔子紅真一仙釀香浮濃
黎生父老欣竒逢載酒登堂時一中先生微醉春融融
人傳海外文益工似聞章蔡方登庸萬物變滅如飛鴻
玉局歸老吾誰從百年廢址深蒿蓬彭侯佐州化時雍
作堂肖像追古蹤春秋記事報德豐樂府新歌被蠻童

從此華夷風俗同
儋人世世祠蘇公

七十吟

我生愚拙少孤苦
疾病仍多煩保乳
年壯志立超俗氓
獨好詩書力稽古
采芹泮水事遠遊
遂令二子持門戶
史館編摩凡幾載
歸老貶恩霑父母
豈知舊宅化桑麻
高卧空山無伴侶
人生七十世稀有
今我已閱此寒暑
為仁不富鄉黨忽
清節康強天所與
但得佚老堂三間
孫子綵衣羣戲舞
純白道人七十吟
再作東湖風月主

贈寫真汪鏡湖

鏡湖流水涵秋清，照見萬物無逃形。
懸知悟取金粟法，况乃家傳獨擅名。
虎頭燕頤靡不似，紫髯鐵面何其英。
善貌高僧說法相，巧模處士哦詩情。
我本山林麋鹿姿，少壯偶為世網嬰。
顧今歸田事閑暇，邂逅逢君眼輒青。
欣然點綴寫衰朽，病骨藏昂太瘦生。
朱衣象簡差少貴，雪鬢霜鬚老可憎。
旁觀側視良眦眦，睨婦女失笑兒童驚。
往來芝田挾此藝，黃金堆屋官蓬瀛。
君胡不往遊上京。

上京比屋皆公卿

春草曲

春風如水流春草生芳洲遊子有遠志孝子無別愁吁
嗟孝子芝蘭美不出庭闈奉甘旨可憐遊子飛蓬似春
愁草綠千萬里兒衣母線春風吹春暉滿堂草菲菲遊
子歸來慈母喜階前鬪草看兒戲

孝養歌示大兒

夫養父婦養母夫婦孝養今稀有園池花竹娛老境甘

旨杯觴開笑口夫夫婦婦一家範子子孫孫百世守木
有根兮水有源水流無盡木陰繁白鹿峯頭飛白雲隱
居讀書思古人

遊赤松

赤松樹下流丹泉白石皤皤如羊眠萬古山川獨神秀
二黃兄弟皆成仙我來又值玄冬候澗寒水落梅花瘦
野人應笑白頭新羽士相逢青眼舊焚香閉閣飯胡麻
留宿雲窻夜煮茶約我春風二三月小桃源裏看紅霞

上都回

去時兩馬行遲遲回時四騎如飛馳良友勗我虞險阻
不知漸老筋力衰赤松風度鑾坡客襄陽浩然愛哦詩
回仙笑談時絕倒路人逢我呼太醫秋光晴日殊可喜
向所未見今得窺一朝風雨天莫測泥塗爛熳衣淋漓
黃昏下馬投土室薰然煖榻舒四肢五更睡熟又催起
此身安樂知何時居庸山水新霽色左右清景軒鬚眉
健德門前一杯酒崎嶇已復還京師長歌紀述上都回

聚散行止非人爲

孫澹如墨梅

寫梅老手稱花光誰知並者楊與湯
孫郎晚出亞三子筆端造化分毫芒
澄心古紙生秀色枝柯瘦硬骨老蒼
疎花冷蘂隨手出直恐勾引蜂蝶狂
眼明見此橫斜影鼻觀已作春風香
何妨尚玄不尚白妙意有在終難忘
小窓淅几風日靜坐令孤山歸草堂
是真畫莫生別為歌一曲傾一觴

純白齋類稿卷六

欽定四庫全書

純白齋類稿卷七

元 胡助 撰

五言律詩

春遊三首

門掩青山靜鶯啼白日長
滿壺攜臘蟻在處賞春芳
樹煖行新影花多散異香
余心有真樂豈學少年狂
空谷窮幽討深春少定期
澗花和露折寺石帶雲書
山煖獨聞麝水清時見魚
吟成歸較晚長嘯月明初

古洞春香遠尋芳步不停
崇桃熏眼醉急瀑洗心醒
鶴睡石雲煖馬嘶沙草青
誰家修竹好幽戶隔花扃

秋夜旅懷

棲棲何所慕林暝鳥飛還
秋意水邊樹鄉心雲外山
月寒知暑退夜靜覺人閑
索索葉成語西風滿竹關

病中述懷

藥裏經營久吟懷尚悄然
園池荒病日艸木厄饑年
梅逕落香雪柳隄生煖烟
西湖春事好那得理征船

雨中卧病二首

雨脚何曾斷
簷花滴到明
水流牀下出
雲自屋頭生
野港渾迷岬
村船直入城
民方病艱食
撫字可無情
簷滴穿愁耳
蕭齋獨卧時
貧方竒善賈
病始憶良醫
市遠囊無藥
人癯鬢有絲
平生丈夫志
猿鶴豈能知

再用韻答季仁伯二首

裏雲山木暗
然雨石榴明
沙鷺吹魚落
舟人看水生
烹茶驚困魅
呼酒破愁城
泥滑無來屐
脩然絕世情

風雨無虛日黃梅熟盡時塵纓泉可濯俗病竹難醫蝸
壁行蚪斗蛛簷設網絲小窓吟苦處唯有故人知

李息齋墨竹

今代湖州筆渾無半點塵霜竿餘老瘦雨葉極清新變
化孫吳法風流晉宋人可能醫俗骨莊氏此凝神

送師古姪孫之杭

三酌陽關酒臨分思黯然寒燈歌客枕瘦馬聳吟肩木
落江風外潮生海月邊孤山梅鶴在為我酹逋仙

和許振古溪上晚晴

春寒花事晚何處暢幽情石雨苔紋積沙風鳥篆平山
明雲有影溪漫水無聲夕照烟光紫歸牛一笛橫

和古學兄秋日出行

扶竹歷寒墟幽尋靜者居秋深山漸瘦病減友仍疎世
網夢中鹿天游濠上魚黃花忽到眼彭澤興何如

對梅

坐牕觀復妙搖落見孤芳數點雪爭白一枝春破荒冰

池沉瘦影月屋老清香與爾同枯槁凝然到坐忘

挽凌吉叟教授

惜甚雲霄志傷哉露電身青衫沾一命黃壤閱千春俸
為收書盡家緣好客貧茂才充貢者寧復似斯人

挽方存雅先生二首

平生山水屐眉壽益詩昌古意回風雅清言越晉唐仙
華秋月冷江浦夕雲荒博士當銘筆門人著耿光

黍熟南朝夢劬書但苦吟一編風雨集千載友朋心猿

鶴驚長往湖山憶共臨鄉閭遺老盡清淚滿衣襟

宿元符宮呈王牧齋宗師

草木皆仙氣丹房閉寂寥山高星斗近洞閒水雲遙夜
醺鳴金磬秋吟和玉簫明朝騎鶴出別館謁王喬

冷泉亭得炎字

靜定燭豪纖山僧看不厭一泓澄碧冷千古滌朱炎流
出仙源遠飛來佛國無香塵那有污潤物本無嫌

次韻聞鵲

啼到天津上繁華一夢空東西猶異產南北豈同風月
冷依秦樹雲晴遠漢宮錦城歸去好誰解駐春紅

次韻朱仲山過錢塘

禾黍遺千載東南第一邦望雲生海嶠帶雨絕濤江忘
世浮鷗聚留人語燕雙君詩鐘萬石寸莛曷能撞

和道心姪山居

高榭何能構空臺漫自基水邊梅白處霜後橘黃時掃
葉穿林遠看雲坐石遲清吟興微醉此道既軒義

挽王雪溪二首

卧疴纔半日遽作玉樓仙
野服成親賻松棺製學錢
謀生真泣露取友獨忘年
遺稿如山積兒孫豈解傳
擾擾百年內翩翩一夢中
有形均是幻無色不歸空
老懶添詩債逍遙策酒功
斯人今已矣誰復與吾同

長至

雲物有佳色梅花何處香
乾坤回始泰律呂動初陽
歸夢憐宵永清愁又日長
遠遊成底事兩鬢欲蒼蒼

春日言歸

春色明宮柳京華獨縕袍雲霄崇世祿臺閣聚時髦有
道貧方樂無官歸亦高光風滿天地隨處可遊遨

哀李清臣侍御

慷慨由中定艱危見處真全生多失守一死獨成仁正
氣扶皇極忠風動紫宸易名褒典在千古勸為臣

寒食

花柳平原盛提攜滿路傍時思當火令野祭哭春陽裂

紙標青塚傾壺醉白楊
油然追遠意吾亦憶吾鄉

過青州呈丁幼度御史一首

南下逢初暑兼行帶曉星
雨行垂野黑水樹入船青
愁絕吟難就涼生夢易醒
暫回風半席醺酒乞江靈

李海務和御史韻

魚貫帆檣集郎君氣勢雄
河源晴易泄水脈暮皆通
復此留終日何煩得便風
所思歸越上高卧白雲中

挽胡石塘先生二首

久矣錢塘客儒林志獨勤力行修古道邃學琢雄文絃
誦三年佐聲名兩浙聞凜然生氣在尚想唾青雲

吾宗文學老義氣晚彌剛寄迹青蓮宇無心白玉堂飲
瓢甘菽水易簣正冠裳一葦靈輒遠西江恨渺茫

東昌道上

長河春欲暮高柳綠成陰野迴雞聲遠沙虛馬跡深雨
來雲潑墨月出水浮金此景憑誰繪停橈付短吟

過淮安

喜過淮安郡風帆掛落暉席偏坐不穩岬轉去如飛宿
麥連雲秀春花入夏稀渡江知有日浙水竟東歸

姑蘇書所見

闔閭城最古臺榭俯長川水國船如屋人家屋似船板
留黃鳥外倚棹白鷗前日暮吳歌發滄浪濯足眠

挽劉師魯二首

學古成清隱我冠似舊時中興名將裔盛世老儒師騷
雅詩千首風流酒一卮平生求益友後世愧相知

名滿江湖上身居陋巷中典刑存冠帶冰雪貯心胸高
論驚流俗雄文復古風武林遺老盡清淚滴秋空

道館夜雨

道院吳山下梅花歲事闌人皆忙裏過我獨靜中看丹
竈松雲暖青燈竹雨寒胎禽鳴夜半有客夢長安

挽揭曼碩學士二首

白首陪經幄丹心侍玉除兩楹俄夢奠三史未成書誠
一宗君實浮誇厭子虛東南遺老盡吾道竟何如

清苦平生節聲名夙有聞朝廷方用老翰苑久擣文眷
遇身難退裁成志獨勤坐隅驚鵬入萬里哭秋雲

春風軒為蔡士安作二首

氣象唐虞在微和拂面吹杏壇聞講日沂水詠歸時
靜花光合簾虛花影移乾坤生物意能有幾人知
近午看花柳春風入草廬圻他方長物吹我讀殘書
富貴三生夢中和一月居微吟飲醇酒半醉興何如

遂心堂發源汪氏

堂構佳山水優遊日醉吟隱居增別業逸老遂初心亭
館鶯花盛園池竹樹深平生樂志論何必羨朝簪

寓樂樓

花木繞重屋雲烟含令姿鳥飛瞻廣宇魚泳俯深池秋
月清吟夜春風微醉時此中千古意寧許俗人知

春日即事

京華寒食近客思轉淒迷春巷一宵雨天街三尺泥宮
花紅影濕野草綠痕齊寂寞抄書坐扃門到日西

和王治書題道士幽居韻

幽居塵事遠燕坐古松邊
劍氣衝丹室琴聲落澗泉
春雲生白石秋露洗青天
獨得山中樂長年此學仙

營中述懷二首

開國先鋒騎屯耕古戰場
老儒甘寂寞此地極淒涼
曉露凝沙白秋雲覆草黃
更無人問字終日面頰牆

野甸寒威極燒茅擁敗繒
懶能梳白髮愁祇對青燈
雪夜一輪月霜天萬木冰
越南歸路杳清興不堪乘

挽袁伯長學士二首

鯨吸朱提鯀龍吟綠綺琴著書籍古學掌制擅詞林氣
宇青天杳淵源碧海深斯人寧復見淒斷越山陰
孤舟歸鏡水無復夢金鑾古器雲雷富高懷星斗寒東
南喪文獻朝野哭衣冠十載座中客驚呼涕淚酸

送崔遜齋兵部奉祠還高麗

恩重君親報唯云孝與忠溫恭寧事外出處貴時中萬
國衣冠會三韓禮樂同鴨江春水綠朝日正生東

和王繼學廉使樓上獨坐二首

千嶂烟雲濕雙溪草樹長平生耽水石是處卜林塘日
靜清冰署春深白玉堂當年門下客復此獲徜徉
退食看山坐凭闌覓句時晴天鴻去遠春雨燕歸遲山
藥和雲煮江花帶石移所欣公病減物物詠新詩

送方縣尹

百里子男國松陽近古淳飛鳬花縣曉佩犢野田春家
富招名士官清恤小民京華塵夢遠棠樹綠方新

挽宋獻公誠甫二首

至治龍頭選端為天下奇東曹持正議西掖擅雄詞吾
道誠無間同年匪獨私新阡封馬鬣揮淚讀銘碑

苦學修清節逢時道亦行朝端儀典禮海內仰聲名宗
伯方推轂成均遽奠楹易名虞祭畢稽古極哀榮

松巢

太古遺民在巢居適所安白雲封戶牖青露滴衣冠鶴
夢三更寂龍吟六月寒幽棲無外慕肯作大夫官

端午漫題

老罷離騷讀青銅雪鬢雙久貧交易絕多病酒難降節
物薰風館歸心夜雨窓當時蕭艾盛吾欲駕濤江

挽許益之二首

講道宗濂洛窮居樂孔顏平生黃卷上多病白雲間嗣
派歸東浙傳衣自北山丘園終不起天爵貴疇班
易簣驚鄉黨東南喪碩師化人唯篤敬稽古獨精思雲
谷生徒散河汾弟子悲遺書應有託千載耿光垂

題清白泉亭

一酌黃清白三年政善良鑑明全體靜物潤活流長吳
令今無忝梅公古有光作亭貯風烈歌詠比甘棠

除衛教

屯田營細柳易水覓漁竿白髮新文學青衫舊史官饑
方謀飯足老未脫壇寒人道軍中樂絃歌處處安

挽馬伯庸中丞二首

稽古陳三策窮源貫六經文章宗館閣禮樂著朝廷執

法頭先白掄才眼更青堂堂寧復見老淚滴秋冥
魁然成傑出霄漢久翱翔獨秉代言筆頻修薦士章苦
心詩草在雅志石田荒夢冷淮南月令人益慘傷

聚星圖

矯矯陳荀氏龍鸞子弟佳軒居閒有適尊俎靜無譁天
意分三國星輝聚兩家流傳好圖本彷彿古烟霞

中秋寓僧舍

西風吹客袂堪笑此盤桓萬古月長好中秋人共看明

生虛室白清入定僧寒來歲知何處禪房憶倚闌

竹雨山房

古宅千竿竹蕭蕭雨滿林寒聲驚睡鶴亂點滴歸禽人
語燈窓暗泉流墨沼深兒童游釣處白首重追尋

和治書題九成宮圖韻

九成清暑殿華靡即隋家遺曲轉春鳥殘碑塗暮鴉天
池涵日月宮樹鎖雲霞千古看圖畫浮生豈有涯

和治書題驪山宮圖韻

致理開元後繁華孰與京山頭曾駐輦谷口未聞鶯浴
殿泉流暖霓裳國勢傾西歸重幸日揮淚獨淒清

笑閒亭

結亭山水曲此樂幾人知一笑忘機久長閒覺老遲虎
溪相送處栗里獨吟時會得其中意春風滿酒卮

智者寺二老亭

當年方外友長此共登臨二老遺風在雙清古意深澹
忘經世念靜見在山心一段川雲洛宗門有嗣音

藏六處士

太極本無極化生陰與陽一從何處起六向此中藏
白曰龜齡永青天鶴髮長人心原有易領會即義皇

潭心齋

純玉寒潭碧心源向此逢千秋涵日月一鏡照蛟龍
靜極天同體澄虛物自容邈哉川上老末派永朝宗

送曾止善孔廟司樂

奉檄趨東魯嚴恭事聖人虛堂金石奏新廟豆籩陳雲

氣泰山曉杏花沂水春優哉游藝圃從此沂通津

黃晉卿同遊靈隱天竺

靈鷲飛來古清遊興頗濃泉音穿積石雲影翳長松好
友常難約高僧豈易逢更尋天竺去山水翠重重

大駕還內

清暑還宮闕露源秋氣分袞龍飛白日天馬駕紅雲麾
仗儀爭觀簫韶奏總聞都人增喜色萬壽祝吾君

木尚書耆壽市居

黃髮尚書老屋居雜笑言市朝忘隱顯鐘鼓自晨昏聽
履多賓客縣車盛子孫西山時引睡北海日盈尊

和仲實韻

兩崖夾修澗亂石列千峰形勝可強國笑談能折衝貴
人常此過隱士不曾逢六月忽風雨淒涼如早冬

雲州


暑雨不時作山流處處狂牧羊沙草軟秣馬地椒香夜
宿營羶帳晨炊頓土房雲州今又過明日到灤陽

李陵臺

西照荒臺遠猶慙太史公君恩如水覆臣罪與天通汗
簡家聲墜降藩士氣空河梁他日別淒斷牧羊風

過青州呈丁幼度御史

一筆江湖上誰占執法星柔柔採還綠短髮難纔青月
照歸心折風吹醉面醒清時盡忠孝不愧北山靈



純白齋類稿卷七

欽定四庫全書

集部

純白齋類稿卷八至十

詳校官編修_臣翟槐

中書_臣劉源溥覆勘

總校官進士_臣繆琪

校對官中書_臣王家賓

謄錄監生_臣朱學源

欽定四庫全書

純白齋類稿卷八

元胡助撰

七言律詩

元會口號

大明元會肅朝儀
萬舞充庭翠袖低
千羽龍鸞翔下上
衣冠鵷鷺列東西
星環黼座韶音振
日轉瑤階仗影齊
咫尺天顏知有喜
九重春色煥文奎

天壽節和韻

曉開閭闔九重霄仙仗繽紛擁旆旌萬歲齊呼中嶽近
衆星環拱北辰高日臨析木儀丹鳳雲遶蓬萊醉碧桃
白髮詞臣同率舞彤墀班末是青袍

上已從康里子淵拜魯國文貞公墓

宰木森森馬鬣封肅然生敬若從公漢廷儀表羣賢右
魯國衣冠百世崇想見英靈環北極永思時序奠東風
我來陪拜增瞻仰厚德清芳繼不窮

王氏德符堂

高堂華扁記雄辭善慶功成有所思
俛仰先人種樹處徘徊使節過家時
綿綿瓜蔓深根蒂鬱鬱槐陰茂本枝
更喜校書天祿閣青箱遠業付佳兒

送余德撫南歸燎黃

聖恩深重勸臣休喜泮春冰解去舟
隨碣製登三品貴璽書光燭九原幽
外臺舊肅觀風使宗伯追榮列郡侯
此日更知公有子燎黃纔了上瀛洲

和馬伯庸同知貢舉試院記事

宗工羣彥列如牆半是先朝白髮郎柱史獨還評月旦
諫書頻上惹天香鸞儀夜靜奎明室雁塔春深笏聚牀
得士無慚龍虎榜盛朝一變古文章

南宮樹棘閼蕭牆周衛仍煩執戟郎初聚五星紅燭影
纔分一夕綉衣香戎冠儼侍趨宸極射策詳看近御床
盛世流傳文治洽銀臺通進少封章

杜清碧思學齋

先生高尚芟荷衣結屋藏書入武夷泉石洗心無別事

皇王經世有遺思據梧即詠秋清夜隱几冥觀晝永時
求志獨修天爵貴故應荷蕢接輿知

送王治書分臺上都二首

翠華巡幸度桑乾萬騎如雲衛後先北嶺高寒天氣別
南屏蕭爽地形偏薰風帳殿青冥上微雪羶車白海邊
獻可從容惟覓句繡衣元是玉堂仙

臺端咫尺近天威霄漢星懸執法輝夜靜周廬傳禁柝
暑清甲帳進宮衣龍門曉日乘驄過灤水秋風看雁飛

想見從官多賦詠時巡無逸諫書稀

開府大宗師張公遊仙詞五首

羽服初歸虎豹關貞姿秀骨動天顏式昭聖眷風雲會
早著神功日月山歷事五朝聞國論載升一品冠仙班
詞臣像贊承恩詔玄教宗風滿世間

寶冠文物偉龍光鵲尾爐熏衆妙香道贊有元宗教始
功扶詞漢正源長至誠齋肅通宸極重賜便蕃出上方
濁世牝糠俱掃盡翩然翳鳳白雲鄉

始終異數獨能金玉印親承黼扆前一代宗師百代祖
三分宰相七分仙立功有赫唯誠爾大道無為本自然
弟子得人光入室顯揚嗣教永流傳

開府榮名久具瞻化爰清靜慰黎黔持身約素損中損
照世焜煌謙外謙芝圃春恬延瑞集桂宮風肅致祠嚴
山中龍虎神仙宅虹貫丹房冷玉蟾

誌祀忠勤歲扈從聖神誕育重遭逢一編輔治傳黃石
千載真游繼赤松但見仙人身化鶴寧知老子道猶龍

江東會葬衣冠處五鳳樓深草木濃

和治書寄吳真人韻

江西方士候鄱君迎笑天香滿袖雲石室異書松下讀
竹齋清磬月中聞青牛駕出飄仙氣白鶴歸來語夜分
薄海蒼生均賜福鳶魚飛泳總欣欣

送王繼學江東蘄使

宣城草木起清風謝眺青山在眼中赤壁仙人來海上
繡衣使者過江東盤鵬勁氣凌蒼柏鳴鳳祥輝映碧桐

一道澄江如練靜還朝仍作黑頭公

蘇伯修滋溪草堂

曾過灤城有所思溪光野色靜朝暉三楹老屋藏緗帙
四世儒冠到繡衣君子流風開遠業史官直筆著清輝
試看燕趙多豪貴金壁如山轉眼非

送徐中孚祠武當歸桃源

白日飛光急景催秦人避世古巖隈霓旌絳節穿雲去
春水桃花出洞來朝罷玉宸吹鳳管讀殘黃老坐莓苔

長松樹下逢真逸笑說求仙海上回

次韻治書題九成宮圖

冠山臺殿壓雲平貞觀初隆四海清
畫靜侍臣窺染翰暑微宮女學吹笙
醴泉新為翠華出御榻長依紫氣橫
可是丹青誇妙絕至今殘本價連城

次韻治書題驪山宮圖

晚妝慵困內人催幾度華清賜浴來
萬室笙歌連谷響千門錦繡倚天開
傷心蜀道傳鈴曲回首漁陽送襪埃

莫說向來亡國恨
水光山色冷如灰

送周本心修撰祠南嶽

紫烟縹緲御爐馨
萬里光華候使星
榕暗修途雙隻堠
花飛古驛短長亭
海灣日湧鯨波赤
衡嶽雲開石廩青
奇觀盡收還玉署
天顏有喜問生靈

送史正翁嘉興經歷

萬里扁舟幾賦騷
蓬山不戀故人袍
賓筵但得尊鱸美
幙府寧知案牘勞
澤國春波鴻去遠
華亭秋露鶴飛高

都門送別花如雪使我歸心折大刀

送王安道處州知事

馬行馮嶺鬱嵯峨草舍民淳奈樂何孔廟韓碑天下少
黃祠李篆洞中多郡齋晝靜依蒼栝幕府風清泛碧荷
地近雁山堪吏隱謝公屐齒在烟蘿

送鄭彥禮同知

聲華先已播南雍暫撤朝班赴治功掌制昔居詞苑右
分符今與使君同馬行石磴秋雲上人在榕陰古木中

廉政歡謠民俗阜絲綸還侍大明宮

送唐梅宇真人歸江陵

真館承恩久服勞翩然歸賦遠遊騷九天星斗蒼龍佩
萬里烟霞紫鳳簫苦竹泉傍祠老子梅花宇下列仙曹
明年我亦江湖去何處相逢酒一瓢

萬安寺觀習儀

衛士金吾塞梵宮旌麾妍麗映寒空倣陳元會千官肅
恭習朝儀萬國同禮樂雍容全盛日衣冠文雅太平風

小儒拭目還心醉歸對書燈守歲窮

聽琴

勇士軒昂馬赴坡絲桐古意妙如何高山流水知音少
飛絮浮雲變態多三疊秋風巫峽雨數聲落木洞庭波
請君試鼓陽春曲坐使乾坤萬物和

王氏自得山居用陳衆仲韻

高人情性愛吟詩卜築山間樂四時明月清風真自得
白雲流水是深知鳥鳴春意爍中樹魚泳天光石上池

空羨隱居無限好素衣化盡負幽期

春闈對讀同趙子期黃子肅夜坐

卷束如山塞坐隅通宵無寐亦良劬雄文往往驚投壁
清誦琅琅美貫珠花眩眼明親蠟炬聲乾舌本沃雲腴
朝來喜色逢春雨襟被連牀二妙俱

和虞學士讀廷對策玉堂有賦

直廬讀卷有元臣喜沐恩波物候新楊柳微風奎閣曉
杏花初日玉堂春檢書慶衍雍公澤發策文明孟氏醇

焜耀天門龍虎榜周家百世有深仁

奉祠三朝御容

三祖皇靈儼若存
孝思時薦像臨軒
山河隆準天威近
日月重瞳玉色溫
赫赫聖神開朔甸
明明英武拓中原
貽謀功德咸歌頌
獨有微臣愧討論

題蘇郎中墓碑

蘇公敬獄慶源長
偉績流傳在發揚
幕府平反疏枉滯
塞垣委積化饑荒
蕭曹事業今無及
班馬文章古有光

教子義方書滿屋鯉庭史筆最稱良

南城書院和王子肅韻二首

閱卷匆匆永夜過風簾官燭淚流波
冥心學術蟠千古
快意詞源導九河
仙伯金華司桂籍
文儒玉潤聚鸞坡
春闈却是龍飛榜
依舊燕臺得士多

風簷光景莫虛過
變化鯤鵬北海波
但覺銜枚如赴敵
敢談辯口似懸河
點頭卷好逢宗匠
執法星明近諫坡
簾外官閒深院鎖
詩筒來往不嫌多

試院和主文魯子翬僉院韻二首

興賢求治萬方懷，干羽敷文舞兩階。
宗伯率先司主試，史官例得預堂差。
天香縹緲來深院，燭影朦朧坐小齋。
却憶少年勤夜讀，山窓月上落松釵。

京尹興賢蘊素懷，盛張騶從入賓階。
但聞計吏趨科選，無復行人說點差。
霜氣稜稜御史府，禮容穆穆太常齋。
臨池筆法知何用，書榜縱橫折股釵。

試院和程厚甫韻

白袍吹送上青雲幸會龍飛萬象新
君子揚庭鳴彩鳳
聖人在位見祥麟諸公舊夢攀仙桂
獨我清時起釣綸
遺逸更求科舉外故應林下不逢人

上京紀行再賦居庸關

澗谷纔容兩軌行全燕阨塞自天成
折衝險道四十里
制勝中原百萬兵過者但知今北口
居人不識古長城
清泉白石幽深處暑氣絕無寒氣生

龍門

龍門兩岸倚霄漢禹鑿神功壯九圍日月東西自吞吐
乾坤南北總樞機片雲作雨千峰暝頃刻流泉百道飛
老病詞臣逢偉觀吟鞭緩策不須揮

灤陽七夕分韻青字

家家綺席設中庭兒女喧譁擁碧軒天上樓臺當七夕
河邊機杼會雙星橋橫鵲背秋凝恨菓結蛛絲夜乞靈
曉別西風洗車雨龍沙漠漠遠山青

灤陽述懷

翰苑何曾紀聖謨灤陽萬里一身孤
秋風起處黃榆落
夜雨盡時青草枯
雪壓黑山屯戍帳
雲飛白海獵圍圖
屬車來往常親見
神武開基自古無

再用韻荅虞學士

稽古雄文自典謨
先生忠義立朝孤
秋生灤水情偏逸
爽入鼇峰思不枯
經世大書光制作
奎章諸老盛儀圖
岷峨山色青長好
一任浮雲自有無

三用韻荅吳宗師見和

宣室從容昔進謨
玉烟劍氣鶴飛孤
千年骨換丹砂熟
幾局殘棋白石枯
天上仙人承露掌
山中老子看雲圖
碧牕隱几清秋日
萬籟蕭蕭聽到無

四用韻贊虞公為宗師書看雲記

八分古隸軼君謨
思入風雲態不孤
墨潤長驚雙鳳翥
筆乾時見一槎枯
諸儒灑水清秋會
老子函關紫氣圖
自昔通家成故事
覈玄講易世間無

龍虎臺

縹緲神京五彩邊不基開拓肇全燕地形龍虎臺千尺
國勢山河卜萬年畿甸周遭明日月居庸險阨古風烟
都人長此迎清蹕湛露光中白雁前

題鄭義門并序

鄭氏義門旌表久矣邇者余僉憲行部經過大書東
浙第一家五篆文以褒之此觀風職也助嘗造義門
獲拜期頤之老於牀下見其長幼有序衣冠濟濟一
家三代之風也嗚呼盛哉軌賦近律一章以紀云

相國鴻書護碧紗鳳林淵藪閱烟霞南方禮義無多族
東浙衣冠第一家天上經筵資檢討里中文學被光華
觀風善俗加褒表厚德清芬豈有涯

助告老南歸述懷一首因留別館閣諸公既承
和章以耀其行而書鄙句於其端云

來往京華三十載自憐孤苦傍人門白頭始遂歸田志
朱紱新承致仕恩上苑鶯花春夢老故園松菊晚香存
太常博士古官職贏得虛名遺子孫

純白齋類稿卷八

欽定四庫全書

純白齋類稿卷九

元 胡助 撰

七言律詩

送簡秋碧管句還孔林

孔廟摧頽久不修，下僚銜命走神州。
浮雲疊武斯文晦，殘照林亭古木秋。
天厯聖人祠闕里，太平元士贊皇猷。
鵬飛改觀光鄒魯，金石鐫辭頌德優。

和馬伯庸道宮夜坐

退食儀曹日影西
玄都下榻似仙棲
羽衣仙樂傾新曲
石鼎詩聯補舊題
火軟丹房溫坐毳
酒消冰盃凍羹藜
道人靜聽尚書履
萬丈寒芒聚壁奎

和趙秉彝夜坐見寄

北風朝暮撼松檣
詞客相過始啓局
汲井層冰敲碎玉
烹茶宿火撥殘星
愁吟筆凍書難好
僵卧氊寒夢易醒
無補明時嗟欲老
此身如鶴瘦伶俜

次韻逯彥常遊江心寺

東甌山水勝他邦，突兀胸奇向此降。不使一塵生絕壑，
長留孤塔峙中江。月移松影橫鮫室，潮漬苔花上石幢。
安得相逢共遊覽，浩歌醉倒玉瓶雙。

敬亭春雨樓為繼學廉使賦

嵐氣山光接太空，詩樓新製擅江東。官居憲府雲霄上，
人在敬亭春雨中。花木護寒陰漠漠，琴書生潤晚濛濛。
千年謝李風流遠，一代聲名屬我公。

坐邀山色軒

高人拄笏澹忘形賓接千峰主敬亭排闥相看仙眼碧
款門長對佛頭青雨來送爽鳴瑤瑟雲度飛陰卧玉瓶
獨攬光華成百詠能令李白醉魂醒

陪蕪使遊昭山亭

宛陵春色有餘芳出郭清陰逸興長雲樹深藏金刹古
山花時拂繡衣香唐僧卓錫湧泉水裴相讀書留草堂
休日從容陪勝賞微吟淺陋不成章

送蘇伯修分院上都

詞臣扈蹕更遭逢共沐恩波喜氣濃下直錦袍淋馬酒
大酺擅帳割駝峰白河秋早旌旗合黑谷雲深劍佩重
想見翰林蘇應奉樂章進擬動天容

送李仲甫應奉祠西蜀

詔選祠臣太白豪西馳代祀豈云勞仙盤映日華峰峻
棧道緣雲劍閣高中肅祠庭陳玉幣前驅使節擁旌旄
還朝應為扶衰老叩竹過肩贈我操

送蘇伯修南臺御史

九重明達選英髦，多角峨峨展素操。才學久居文館盛，聲名更入憲臺高。風霜總避新驄馬，冰雪相看古錦袍。建業青山真似洛，咨詢歷覽遍江皋。

送王君賓西臺御史

經世書成煥壁奎，風清臺閣映金閨。佇聞丹鳳鳴岐下，又見青驄到隴西。漢苑故基春樹遠，秦川平隰暮雲低。封章稍簡尋詩去，好在唐人向上題。

冬日書懷

天北雲容雪意稠東風何日上歸舟小兒鄉里當差發
老子京華尚滯留道義寧非一身貴功名總是百年愁
平生有志成迂濶堪笑還家已白頭

秋月寒潭

一輪桂魄挂長川百頃寒潭古岼邊水影淨涵天上月
月光清澈水中天洗空河漢秋無際冷射蛟龍夜不眠
收取釣絲歸去好三更冰雪滿漁船

送周伯溫廣東僉事二首

詞林藝苑擅豪雄異數升遷出帝衷三載侍經環北極
一朝僉憲振南風身居柏府冰霜上思入梅坡玉雪中
未必羊城能久駐青春有詔趁歸鴻

過家綵服映朝紳忠孝純全益顯親秘殿結知聖天子
高堂喜動太夫人威行風采搖山嶽膽落奸貪泣鬼神
從此鵬搏知遠到他年勲業畫麒麟

王氏慶壽堂二首

舊隱蒼苔滿石田使君家世本潼川槐庭陰古多培德

荆樹花榮半學仙
錦水天風黃鶴外
綠衣春晝白雲邊
懸知慶壽堂中老
細酌流霞不計年

風流江左故侯家
逸興超塵豈有涯
兩袖天香朝北極
一杯秋水誦南華
舊藏竹簡叅黃石
新製萊衣翦碧霞
自古丹成由孝行
銀潢八月試乘槎

太白樓

齊魯平原綠樹頭
登臨遐覽憶風流
鑑湖一曲知章宅
濟水千年太白樓
宮錦酒酣飄逸氣
金鑾月落照清愁

自從采石騎鯨去此地何人更唱酬

送袁慶遠潮州經歷

嶺海崎嶇到揭陽民風吏治獨稱良
學師趙子遊芹泮廟祀韓公奠桂觴
幕府移文鯨鰐靜郡齋下榻荔枝香
懸知畫諾今尤盛千仞岡頭見鳳凰

茶屋

武夷新採綠茸茸滿院春香日正融
浮乳自烹幽谷水輕烟時颺落花風
醉歌紗帽扃雙戶靜聽松濤起半空

喚醒玉川招陸羽共排闥闔訴詩窮

又詠

竹屋山房雅致幽
惠泉建茗濯春愁
柴門閉後俗客少
石鼎烹時道士留
苦入肝腸疑骨鯁
香回齒頰儘風流
北窓睡足供三碗
不願人間萬戶侯

賀天師禱雪靈應

綠章夜奏曉雲同
黃閣精誠已上通
龍虎千年傳秘授
乾坤一雪顯玄功
天花密散人心悅
陽氣潛回物象豐

為報新春好消息也知喜色動三宮

賦喜白髮

舉世凝愁君獨喜白紛固與歲寒期陽春不化垂顛雪
清曉惟梳滿面絲朝士鬢邊多為國山人頭上半緣詩
今年我亦周花甲正好銜杯介壽眉

歸來漫題

矯矯冥鴻避網羅征途歲月易消磨故園安在黃花少
老友相看白髮多司馬壯心寧止是淵明歸興欲如何

兒孫繞膝豐年喜時醉新醪一浩歌

追和宋誠甫題蓬萊閣韻

長吟得句勝封侯況是蓬萊閣上遊萬壑飛流春雨足
千峰列筆曉雲收山藏史冊抽金匱帝台詞臣記玉樓
唯有留題在高處緇衣無復繼風流

壽吳宗師二首

孔李通家輔世長兩都來往幾星霜龍川曉護迎天仗
鳳闕春朝侍玉皇圖寫風雲千載會鋪張道德九霄光

玄門殊絕無今古壽櫟山中一瓣香

又詠

瑤池碩果蟠桃懸南極光中窺老仙眉壽七旬又一歲
至元再紀方五年鍊成丹火飛紫雪看盡白雲上青天
縹緲仙家日月永靈椿樹下錦溪邊

宿智者草堂呈輝公

京國歸來訪舊朋祇園樹下試閑行青松夾道石雲冷
紅葉滿山秋雨晴重到上方驚半世清談良夜欲三更

新碑琬琰傳江左師表禪規集大成

送王溫夫宣城教授

束書襆被過江東師範宣城道最隆
禮樂絃歌千里化衣冠文物六朝風
裴休綠野開禪苑謝眺青山繞泮宮
會見聲華騰憲府相思回首暮雲中

濟州阻水

梧葉初飄暑氣煩任城留滯過中原
風雷又送他山雨川瀆方增會水源
天井千艘交纜繫斗門三峽怒濤翻

常時夏涸今憂漲危坐船牕看浪痕

括蒼道中

層巒霧氣午纔收蒼壁飛雲古木秋
馮嶺危盤九天上
劉山勝絕萬峰頭結茅成屋依巖穴
疊石為田繞澗流
未必居人識幽趣長令行旅似清遊

送于壽道知婺源州

分符出守向星源竹馬郊迎二月春
共仰高科推國士
獨持廉節化州民
香凝燕寢黃堂靜
仗引熊軒皂蓋新

朱子故鄉山水窟豈無遺逸白頭人

范文正公忠烈廟

萬石叢生泉一源
太平香火獨長存
西邊事業歸青史
先世英靈卧白雲
義廩久肥吳下族
孝祠遙省洛中墳
我來景仰懷忠烈
幾度徘徊到夕曛

嘉樹軒

昔人種德百年期
嘉樹深根閱盛時
巍巍當軒蟠秀色
森森遶舍沐華滋
閒階鶴下鳴陰遠
空谷鶯來語晝遲

疇賦角弓勤頌美無忘封植有遐思

送上官來復祠嶽瀆名山

翩翩霞佩兩瞳青袖有天香筆有靈上應星辰馳使節
遠窮海嶽禮祠庭四方樂歲祈民福萬壽長春錫帝齡
閒暇題詩尋勝侶山陰重寫換鶯經

李氏遺經閣

乾淳殘刻護神靈華構崢嶸接鯉庭易代文明三建閣
承家業廣一遺經鄴侯舊讀垂籤白宅相新休照汗青

學自五峰傳統緒湖南章甫盛儀刑

寄陳玉林鍊師

羽衣道士識重瞳冠劍芒寒星斗胸赤壁月華驚夢鶴
蓬萊雲氣護飛龍新宮突兀三清殿故國蒼茫六代松
忽憶舊遊今白髮何期再聽蔣山鐘

和王君實員外廵山韻

元臣執政肅留都小隊廵山近甸初曉日旌旗穿水國
秋風劍佩入林居社公酒熟田間醉朝士詩成石上書

白髮史官遲外補此生猶負氣凌虛

送謝堯章

青冥無路志多違金谷冰山亦易非
萬里天風雙鬢老五湖秋水一帆歸
東籬菊花古來好澤國鱸魚今正肥
羨子束書尋故隱長松巢上看雲飛

涿州先主廟

先主故鄉今涿郡我行其野慨英雄
猶存古廟龍顏異無復高桑葆羽同
西蜀偏安付諸葛東吳遺恨失關公

漢家正統終然在千載神遊即沛豐

送蘓伯修准東廉使

觀風使者輟朝紳張祖都門柳色新
玉節光寒淮海月瓊花香老繡衣春
岷峨文獻傳家學山嶽威名廓吏塵
有美皇華臨遣意澄清一道悅吾民

甕天為謝堯章作

古甕空中納九州誰能從我事遨遊
好謀莫作商人喜知命長懷杞國憂
百萬醯雞同旦暮大千野馬自春秋

何當造次發吾覆莊列驚猜讓一頭

高氏四景亭

冉冉年光鬢易星
太行山色滿虛櫺
野花流水春雲白
嘉木繁陰曉日青
種菊閑官吟竹屋
愛梅處士倚松亭
人生適興須行樂
萬事無過酒一瓶

雨竹山房

山房舊隱種琅玕
靈雨鏘鳴古佩珊
入戶清音閑自聽
映牕秀色靜相看
翠搖濕濕琴絃慢
玉立娟娟鶴羽寒

三世對牀書滿屋幾回吟罷獨凭欄

東平段千戶挽詩

太尉名家魯國英
資兼文武識高明
雲飛紫塞朝橫槊
水落黃河夜渡兵
四十九年如大夢
百千萬劫悟無生
郎君惟肖能傳業
何止遺芳在柳營

寄題留槎閣

龍泉爽氣干牛斗
處士幽居意自閑
高閣卧雲超物表
古槎流水寄人間
尚疑星石千年在
曾泛天河萬里還

不用成都重訪卜此生真遯好溪山

純白齋類稿卷九

欽定四庫全書

純白齋類稿卷十

元 胡助 撰

七言律詩

中秋月

水鏡團團掛碧空
山河大地影朦朧
中秋明月年年好
萬里清光處處同
泰華蓮花凋玉露
廣寒桂樹起金風
明朝塵世那堪說
但見童顏變老翁

上享太廟禮成

太乙鈎陳盛羽儀躬祠清廟早冬時裸將冊諡崇徽號
羹定工歌儼孝思穆穆降升三后假洋洋左右百靈熙
明朝法駕還宮後民望恩波四海垂

送祁伯溫御史

國學師模養浩然臺網扶植賴忠賢一封直氣榻前奏
百世高名天下傳剛介獨鳴能決去奸諛內愧豈安眠
要令宗社斯文重砥柱中流障百川

梅所

竹外橫斜野水濱，歲寒何處識吾真。
蠻烟瘴雨面如玉，雪谷冰崖身是春。
東閣巡簷青眼舊，西湖傾蓋白頭新。
光風霽月梅花所，盡屬當年上國賓。

再調編修

山野逢時久，治安曾經執筆遠。
遊觀一生清苦唯文學，十載迂迴復史官。
白髮方新銀海眩，青衫依舊玉堂寒。
老來未遂歸田計，換骨猶遲九轉丹。

沙河舟中

夜來好雨潤桑麻
綠暗園林去路賒
天上雲衣變蒼狗
水中日影動金蛇
老吟苦處愁為客
春睡濃時夢到家
漸近淮鄉風物美
揚州准擬看瓊花

過京口有懷先兄淮海山長

淮海向時曾對榻
江流浩浩莫窮源
金山骨立成焦土
瓜步潮平沒舊痕
萬里孤飛鴻雁渚
百年有感鶴鴒原
禪宮劫火生悽愴
憶共登臨更斷魂

挽王繼學中丞

玉堂揮翰瀉珠璣家學光華世所稀但覺高才無滯事
安知平地有危機妙年臺閣祥麟出晚節江淮退鷁飛
惆悵百身曾莫贖生芻一束淚沾衣

又

平生忠耿豈消磨報國當時薦士多烏府風清中執法
鳳池日永載賡歌人間富貴如春夢海外文章似老坡
慙愧白頭門下客傷心無復聽鳴珂

壽吳宗師

蓬萊深處老仙卿
閑看飛雲眼更明
此日廣成千歲壽
明朝太極一陽生
玄功無迹非常道
造物同遊不世情
晚集瑤池青鳥下
天風吹徹紫鸞笙

南郊大禮慶成

齋宮至敬格穹玄
奠璧鳴韶達燎烟
萬世配郊尊聖祖
一人端冕對皇天
旂常婀娜三光會
雲漢昭回五色連
海內歡心成大禮
恩波同沐慶堯年

題丁元善陽明樓

陽明福地神仙宅縹緲樓居鎖翠微
瑤草長松凝古雪
桃花流水駐春暉
黃庭已換羣鸞去
華表方看獨鶴歸
人世千年一彈指
蓬萊清淺是邪非

送高承之赴崇政巡檢

初試朝衫剪綠羅
蘭亭回首舊絃歌
且騎擒賊將軍馬
休換書經道士鸞
雁蕩雲飛山有澤
龍湫日靜海無波
太平時世官偏好
崇政安居樂意多

中秋宿中山值雨

擇吉相期出國都寧知過雨昧良圖馬行不穩人頻險
泥陷方深路轉迂易水蚤寒雲氣重中山秋半月光無
明朝局轡燕南道更苦淋漓到日晡

和趙子期侍郎延春曉直韻

曉開閭闔日華東入直承恩傍袞龍水淺御溝生薄凍
霜嚴宮樹脫初冬立朝正色階前柏報國丹心石上松
業在濟時方向用願言即取富民封

春闈簾外紀事

南宮會試集羣英
簾外官曹職事輕
對讀文場四君子
監謄筆吏二先生
連朝虛食唯慙色
長晝高談起笑聲
鎖院若開星散後
他年莫忘此時情

和葉敬常危太樸同遊四明東湖

連壁鰲頭蔚有光
東湖勝槩甲吾鄉
青山帶雨秋偏早
積水生陰夏自涼
太史方紬藏秘閣
老儂深炷古祠香
承宣安得如前輩
澤及斯民百世長

除夕偶成

節物紛華除夕至嗟余幾見客京城身輕謝事無官責
年老還家有子迎紫陌糟兵連夜飲朱門爆竹半空鳴
歲寒固守清貧樂窮鬼年年送不行

寄題雪堂重建

東坡遺迹久荒榛遷謫名高寂寞濱竹院再營新繪雪
海棠重發舊時春一襟風月超前古兩賦文章絕後塵
安得登臨拜公像江波浩蕩白鷗馴

赤松宮

萬樹烟霞一水迂
叱羊福地即蓬壺
林泉松石到今別
兄弟神仙自古無
山骨莓苔長是潤
巖腰芝草不曾枯
桃源小有更奇絕
鐵笛數聲秋月孤

智者寺

古木寒流物外心
赤松智者獨登臨
草堂訪舊隔存沒
禪苑談空無古今
石磴巉巖黃葉積
林亭窈窕白雲深
嗟予老矣無他念
洗耳靈源聽法音

虎丘寺

海湧峰藏萬壑冰虎丘竒觀列仙靈劍光湛湛沉寒水
塔影層層上小屏蘓子題詩山亦喜生公說法石曾聽
小吳軒上一長嘯極目平原禾黍青

送巖子山平章赴杭省

公卿祖席上東門花柳芳菲氣始暄輟侍經筵辭禁署
分持鈞軸鎮雄藩湖山日靜居民樂江海春深品物繁
不振儒風資治道芟除蕭艾長蘭蓀

又

德厚才宏簡上知冰清玉潔映黃扉詞林載筆真無忝
相業傳家更有輝野渡潮平舟楫濟新隄沙軟旆旌飛
東南父老勤瞻佇請為疲氓幹化機

始皇

祖龍才略亦雄哉六合為家席卷來函谷出師從約散
驪山築苑後人哀可憐萬世帝王業祇換一坑儒士灰
環柱中車幾不免沙丘同載鮑魚回

長城公

三閣飄香樂意濃賦詩酣飲謝春風金陵王氣六朝盡
玉樹庭花一曲終門外干戈南北混井間妃嬪死生同
他年親上東封表却在開皇宇宙中

明皇

一曲霓裳四海危禍胎為洗錦裯兒豈知勤政開元日
翻作荒遊天寶時九廟蒙塵慚父老六軍駐馬怨蛾眉
間關蜀道歸來後南內淒涼更可悲

子房

一擊豪揮博浪中韓讎未報氣如虹
運籌垓下烏騅逝
留謝鴻門玉斗空
取履早師黃石老
定儲晚取紫芝翁
功成却棄人間事
長使英雄仰素風

蓮花

隔岬新妝浣紗香
風清遠屬詩家留
侯雅稱婦人貌
茂叔深知君子花
碧淨秋波千柄玉
紅酣落日一川霞
蘭舟桂楫紛紛去
憶聽吳歌宿若耶

七夕

靈鵲成橋夜未央佳期萬古益難忘人間漫道經年別
天上祇如一日長玉果蛛絲傳巧意銀河鳳駕碾秋光
歸時不似來時好淚濕紫綃雲霧裳

寒食西湖上分韻得聲字

湖光潋灩雨初晴喜對良辰更合并柳絮暖風吹釣影
梨花寒食起簫聲吟成見竹敲門看酒渴思茶入寺行
薄暮歸來忘息火客牕猶理讀書檠

和方韶卿遊涵碧韻

拂袖高吟夢得詩
緩探陳迹扣林扉
古亭禪刹自興廢
野水閒雲無是非
一沼淨沉秋樹影
數峰長帶夕陽暉
風流縣令今何在
唯有蒼苔滿釣磯

和葛介軒對雨

積雨終風八表霾
簷牙衝濕燕飛回
滿池芳草夢初覺
一徑落花門不開
春事重教隨雨盡
老容暗覺逐愁來
我今祇作歸田計
門外鷓鴣莫浪猜

禪悅庵

雨後尋僧到上方松風吹鬢道衣涼
四簷蒼樹綠陰合一榻閑雲清晝長
竹屋鳴琴連谷響山泉洗藥入池香
俄驚猿狖攀藤出隔水紛紛盧橘黃

寒食雪寄葛介軒

惆悵東風禁火天春寒積雨興蕭然
安貧羞乞墻間祭追養力耕綿上田
滿地飛花猶見雪千門插柳已藏烟
龐公上塚歸來後應採新茶試石泉

和師古姪孫遊禪智寺

竹院松門風自開
齋殘幽鳥下層臺
懸崖瀑近喧清晝
壞壁詩昏長綠苔
花柳盛時春易老
山林好處客稀來
攜觴野飲疎狂甚
祇恐巖棲隱者猜

同李此竹遊西明巖

翩翩數騎入林幽
落照西明轉眼愁
同社已非一日約
仙巖方作片時遊
青枝露下雲巒暝
黃葉風高石室秋
安得春天却來此
卧看飛瀑瀉山頭

贈閑雲屋長老

古衲龐眉棲北山
山中來往盡名賢
蘇仙解帶施元老
韓子留衣別大顛
霞煖蓉峰春覓句
雲寒竹屋夜安禪
何時却入東林社
小結茅茨傍鹿田

送蔣良軒赴闕

遠送故人上帝臺
臨岐握手總堪哀
長亭細雨沾行旆
祖道飛花撲酒杯
萬里蒼生待雲雨
九重明主憶賢才
諒知此去承恩後
故國咸瞻衣錦回

禹廟

陵廟丹青樹篆文梅梁窈石昔人言千年嶽瀆神功在
三代衣冠古塚存日落鏡湖春水遠雨來秦望野雲昏
憑高一覽桑田濶空翠山霏滿寺門

水北山房

水北山房處士廬松筠蕭爽興何如汲泉自試烹茶鼎
眠石常攜種樹書碧色映窓新草長紅芳被徑落花初
幽深不減東西瀼澗底瓜畦手自鋤

寄泰里蔣良軒

故家喬木喜鶯遷危坐談經思湧泉竹徑垂青春有主
草庭交翠意無邊夜來風雨思重念塵世參商各一天
小子學詩興感慨夢我讀罷欲潛然



純白齋類稿卷十